

四庫全書

史部

# 欽定四庫全書

史部

世宗憲皇帝諭行旗務奏議卷八  
四至

詳校官左都御史<sub>臣</sub>李 綬

編<sub>臣</sub> 修<sub>臣</sub> 襄<sub>臣</sub> 謙<sub>臣</sub> 覆<sub>臣</sub> 勛

總校官知縣<sub>臣</sub> 楊懋珩

校對官中書<sub>臣</sub> 范來宗

謄錄監生<sub>臣</sub> 鄒曾蔭

欽定四庫全書

世

宗憲皇帝諭行旗務奏議卷四

八旗大臣等議覆據通政司左叅議常德奏稱開戶人等既不准為護軍亦不應令為領催再領催等亦多有不識字者請將開戶及不識字之領催俱行退回令在馬甲行走等語查一應登記檔案支領官兵俸餉等事俱係領催辦理所關殊屬緊要况領催等漸次錄用皆可得膺官職其開戶人原無為官之例

現今開戶領催及不識字領催內若人明白於佐領下事務諳練者各該大臣等查明應留者照常存留其不能辦事人平常者著退回在馬甲行走外嗣後領催缺出不准挑取開戶人等揀選另戶滿洲挑取若佐領內無可挑取領催之人著會同該旗護軍統領酌量將本佐領內之識字護軍挑為領催再滿洲蒙古漢軍以及包衣佐領內或有人數少者即於開戶馬甲內將人去得識字者挑取領催俟

命下之日將此永著為例遵行

奏入於雍正四年正月十二日奉

旨依議

兵部議覆據吏部侍郎兼理順天府府尹事務張令  
璜奏稱伏查定例凡遇鄉會試期每翼派都統一員  
副都統二員叅領二員閒散官二員令其稽查管轄  
以防弊端立法甚善我

皇上御極以來癸卯甲辰年文武鄉試臣任監臨見滿漢

應試人等欽遵法紀內外肅清毫無作弊之事仰請  
嗣後文武鄉試會試及考取繙譯舉人於左右翼各  
派都統或副都統一員叅領四員令其入闈彈壓至  
考取繙譯一場事竣鄉會試三場事竣應試人等交  
卷出場之後已無生事作弊之人應令都統等官亦  
即出場回任辦事等語查派都統叅領等入貢院者  
特恐應試者或有生事之人令其稽查彈壓也每次  
派大臣二員叅領四員管轄即已敷用應如所請嗣

後科場內每翼派副都統各一員叅領各一員閒散  
章京各一員入闈巡視至應試人等出場之時令副  
都統叅領等亦即出闈回任辦事俟

命下之日著為定例遵行

奏入於雍正四年二月初五日奉

旨依議

副都統額爾德奏

盛京等處之新滿洲索倫達戶里烏拉齊庫雅拉等所

有世襲佐領驍騎校缺出俱由本處揀選一人擬正  
來京引

見後經

皇上特降

諭旨雖係伊等世襲之缺亦應於伊等應襲人內擬一正

一陪來京引見欽遵在案今

盛京等處之公中佐領防禦驍騎校缺出亦擬一正一

陪咨送來京如此則在京所有之年久著有勞績應

陞外省之人似屬壅滯嗣後請將

盛京等處之公中佐領防禦驍騎校等缺仍令本處將  
一人擬正咨送來京該旗於年久應陞人內揀選一  
人擬陪帶領引

見

奏入於雍正四年二月十六日奉

旨外省雖有咨到擬正擬陪之人在京亦著一人擬陪引  
見併將此旨宣示八旗大臣等著令一體遵行

吏部兵部議覆查外省回旗官員任意遲延不即到京先經都統穆賽奏准量其路途遠近務令於限內到京如有違限遲留者照例治罪通行在案茲督臣孔毓珣奏稱回京旗員俱携有眷屬若務令就陸所費甚多必至困敝請於有水路之處仍令在水路行走等語應如所請嗣後凡回旗官員除無水路及情願就陸者聽其在陸路行走外其與水路相近等處官員聽其在水路行走仍令其於原定限內到京如

無故遲延有違定限者照例治罪俟

命下之日通行八旗直省一體遵行可也

奏入於雍正四年四月二十六日奉

旨依議

鑲黃旗漢軍都統觀音保奏稱查八旗各部院互相行文必鈐用印信惟新年封印之後方用白文將補行印文之處註明近見於平常時節亦有用白文者恐不肖之徒從中作弊隱瞞大臣私自行文亦未可

定舉凡公務皆關重大雖甚小之事亦不可忽畧請  
嗣後除新年封印外將平常時節用白文之處永行  
停止庶事件皆有憑據而辦事之人員益各加謹慎  
矣

奏入於雍正四年六月初二日奉

旨這所奏甚是照依施行著查旗御史嚴行稽察

八旗都統等奏稱外省駐防官兵內有亡故及革退  
者例將其寡婦及家口解送來京竊見外省送到之

寡婦及家口內每有到京未久託故告假而去者亦有因無所依附具呈回去者且送到之家口多有與文內開載之數目不相符合者因此臣等合議仰請將駐防官兵之寡婦及革退人等若有子弟已經披甲足以養贍而京中並無產業親族者令該將軍等詳悉查明情由果實准其留於彼處若無子弟在彼披甲實無養贍情願來京者即令其解送回旗該管官務將家口實數查明填寫花名出具保結申報該

將軍等復行詳查交與解送官兵令其嚴加約束勿致生事照例給與口糧船隻車輛於勘合內明白填寫到京之日該旗查明報部給發回文其已經來京歸旗者槩不准其借端告假復回原處再家口人等於途中有死傷逃走者解送官即報該地方官將情由註明黏於勘合之後若人口數目不符多支口糧者該旗查出即行題參將該將軍大臣官員及解送官一併交部察議俟

命下之日行文各省一體遵行

奏入於雍正四年八月三十日奉

旨依議

世宗憲皇帝諭行旗務奏議卷四

欽定四庫全書

世宗憲皇帝諭行旗務奏議卷五

八旗都統等議覆據副都統祖秉衡奏稱伏查定例  
八旗閒散人丁三年編審一次凡身材至五尺者添  
註冊內已故者分析裁汰但歷年久遠佐領等官均  
視為泛常隨意去留不無遺漏錯誤之處仰請嗣後  
遇編審人丁年分各佐領造具戶口冊籍務令開寫  
明白其外官家屬亦不許任意隱瞞交與該都統等

詳查造具清冊二本一本送部一本收貯該旗以備  
查閱今年即係編審年分相應展限半年交與該旗  
各佐領逐一詳查造具清冊保送戶部則既可以稽  
察閒散人丁實數而屢年遺誤情弊亦可剔除等語  
應如所請嗣後造審丁戶口冊俱令開寫一戶另戶  
某人某人有官職者開明官銜無官職者開寫閒散  
某人將伊父兄職名添註本人名下將伊子弟造入  
戶口下俱作另戶分造滿洲蒙古旗下家奴及滿洲

蒙古並漢軍家下壯丁等俱開列花名核明送部其各省駐防官兵以及地方文武各官子弟家屬俱令戶部行文各該將軍督撫查明照此造具清冊咨送俟各處檔冊到齊之日各該旗附入佐領冊內鈐印報部存案以後三年編審一次俱令照此造冊俟

命下之日通行八旗併包衣佐領渾托和一體遵行

奏入於雍正五年二月二十二日奉

旨依議

禮部議覆據副都統侯田象坤奏稱從前乘轎官員至東安門外即下轎乘馬而入隨役不過三四人今則直至東華門外方行下轎卑賤轎役人數衆多坐卧喧雜深屬不合凡一定儀注不容稍越身為大臣尤當首先奉行使在下屬員亦知效法皆存誠敬等語應如所奏嗣後和碩親王以下輔國公民公侯伯內大臣都統大學士尚書漢三品以上官員仍准其在

皇城內乘轎外其六十歲以上老人及有疾之人亦准  
在

皇城內乘轎其餘人等一槩禁止不許乘轎至

紫禁城之門如有違者著都察院及步軍統領衙門查  
拏治罪可也

奏入於雍正五年閏三月十一日奉

旨依議

刑部等衙門議覆據吏科給事中黎致遠奏稱竊盜

耕牛宜嚴加處分若止照竊盜例計贓論罪而估計贓值或有低昂其間雖竊至數隻併贓科擬不過杖刺而止是以人鮮警畏易至犯法嗣後宜定計隻論罪之條等語具奏奉

旨該部議奏續又奉

旨黎致遠條陳竊盜耕牛已交部議奏但欲清其源必須嚴禁屠宰牛隻著九卿一併速議具奏欽此臣等議得耕牛盡力於農畝故律載宰賣偷竊等條但欲止賣

竊之端必宜首嚴宰殺之禁宰殺既無則竊賣自少  
誠如

諭旨欲清其源必須嚴禁屠宰查律內盜牛者計贓以竊  
盜論今給事中黎致遠既稱竊盜耕牛宜定計隻論  
罪之條應如所請嗣後盜牛一隻者枷號一箇月杖八  
十二隻枷號三十五日杖九十三隻枷號四十日杖  
一百四隻枷號四十日杖六十徒一年五隻枷號四  
十日杖八十徒二年五隻以上者枷號四十日杖一

百徒三年再犯者免其枷號杖一百流三千里累犯者發邊衛充軍仍俱照竊盜律刺字十隻以上者照竊盜賊至一百二十兩以上律擬絞監候其窩家知情分贓者與盜同罪知情不分贓者照知人謀害他人不首告律杖一百如知情窩藏竊牛之犯至三人牛至五隻者將窩家杖一百徒三年若人至五人牛至十隻者將窩家發邊衛充軍其宰殺耕牛並私開圈店及販賣與宰殺之人者初犯俱枷號兩箇月責

四十板再犯者免其枷號發附近衛充軍累犯者發  
邊衛充軍其盜牛宰殺及將所盜之牛貨賣者初犯  
照例枷號兩箇月發附近衛充軍再犯者枷號一箇  
月發邊衛充軍累犯者枷號一箇月發烟瘴地方充  
軍其宰殺自己牛隻者計隻比照盜牛例治罪免刺  
罪止杖一百流三千里故殺他人牛隻者仍照舊例  
杖七十徒一年半若計隻重於本罪者亦比照盜牛  
例治罪免刺罪止杖一百流三千里其殘老病死者

不論俟

命下之日行文八旗五城宛大二縣步軍統領衙門奉天等處並直隸各省出示曉諭自奉文以後限一箇月嚴行禁止如仍違者即行嚴拏照此定例治罪可也  
奏入於雍正五年閏三月十一日奉

旨依議

管理旗務王大臣等議覆據前鋒統領鄂善奏稱前鋒護軍內有年少馬上生疎者相應酌量派出令與

本旗領催馬甲等一體前往馬場則每日看守巡查於馬上亦得熟練等語應如所奏嗣後每年出牧之時將前鋒護軍內年少未經隨圍行走者每佐領下各派一人入於馬甲數內令往馬場與馬甲等一同操演騎馬巡查看守庶幾馬上可得熟練每旗派出護軍校二員前鋒校一員令其管轄其護軍叅領不必派往即令出牧之副都統叅領等兼管可也

奏入於雍正五年閏三月十四日奉

旨既派前鋒護軍前往著派護軍叅領四員與驍騎叅領等將前鋒護軍領催馬甲等公同管轄若某旗派出護軍叅領其本旗之驍騎叅領即不必派往餘依議

禮部議覆據吏部侍郎兼副都統岳爾岱奏稱各省督撫提鎮以下州縣千總以上俱定有相見之儀各部院衙門亦俱各有儀注惟旗下大臣官員並無定例以致儀節參差不能畫一仰請交與該部查其品級編定儀注以便遵行等語應如所奏嗣後八旗公

所辦事都統正坐副都統旁坐其叅領於副都統稍後兩旁坐佐領以下及散秩官員各照品級序坐有事叅領起立回話佐領以下官員俱屈一足回話其侍衛藍翎侍衛並拜他喇布勒哈番以上之副叅領署叅領俱照叅領之例行拖沙喇哈番以下之副叅領署叅領俱照佐領之例行驍騎校等有事於叅領前屈一足回話於佐領前侍立回話閒散官員如有公事於都統副都統前阿思哈尼哈番以上官員侍

立回話阿達哈哈番以下官員屈一足回話管旗務  
之王宗室公前叅領以下官員俱屈一足白事管佐  
領之大臣各照品級行小京堂以及科道等官管佐  
領者照叅領之例行宗室管佐領者在旗下大臣前  
俱侍立白事其前鋒統領護軍統領在各公所辦事  
前鋒叅領前鋒侍衛護軍叅領侍衛副叅領藍翎副  
叅領侍衛署叅領拜他喇布勒哈番以上副叅領署  
叅領俱照八旗叅領之例行拖沙喇哈番以下副叅

領署叅領護軍校副叅領署叅領俱照八旗佐領之  
例行前鋒校護軍校俱照八旗驍騎校之例行其步  
軍統領衙門辦事步軍統領正坐步軍總尉旁坐步  
軍副尉在步軍統領前屈一足白事在步軍總尉前  
侍立白事步軍校城門校於統領總尉前俱屈一足  
白事於副尉前侍立白事凡八旗官員在公所辦事  
如遇別旗大臣亦照見本旗大臣之例行倘有越分  
違例任意行走者聽該管大臣並查旗御史題叅交

與該部議處

奏入於雍正五年六月二十九日奉

旨宗室管佐領者於王公前著屈一足回話餘依議

國子監議奏八旗設立官學原欲比戶皆霑教澤不  
必拘定門第但學滿文者可用幼穉之人其學漢文  
繙譯者必得十四五以上資性聰敏之人方易啟迪  
嗣後選官學生務令該佐領擇穎悟俊秀子弟申送  
臣等驗看交與國子監當堂考錄其年幼者令學滿

文其稍長者令學漢文庶將來皆可有成再查舊例  
八旗滿洲蒙古漢軍每佐領下必送一人入學若拘  
於定額則恐草率塞責若聽其缺額又恐人數太少  
臣等酌定每旗額設學生一百名內滿洲六十名蒙  
古二十名漢軍二十名其滿洲六十名內分三十名  
習學清字三十名習學漢字凡有缺出通在一旗選  
擇不必拘定佐領之數庶學生皆得秀良不致混行  
申送再查學舍乃諸生講誦之所今每學止三四間

一旗三學共十三四間不等實屬狹隘應將現今學舍官房各行交還本旗令其另給官房二十餘間量可容百人誦習者著本旗修理俾諸生聚處其中則學舍寬適便於誦讀矣再查官學生習漢字者每旗各設教習五人輪流更換功課難以稽察應令教習一人各派學生若干日處其中專心訓導則將來成否責有攸歸但教習等既不許分班更換則應足其衣食其每年銀米等項相應照景山教習之例給與

則衣食充裕而課讀自勤矣至教習等議叙之例皆以三年為限期滿咨部以知縣候選臣等伏思三年之內若不問其勤惰驟行咨部銓選恐有草率塞責希圖徼幸之弊嗣後八旗教習入館國子監堂官不時稽察如有懶惰者即行斥退其勤謹無過者三年期滿照例咨部以知縣候選如有善於誨誘精勤不倦者再留教習三年俟六年期滿咨部以知縣即用如此則勤惰有分而善於誨誘者亦得久於其職矣

再八旗官學生向來皆無錢糧以故無力之家不能行走臣等查得八旗蒙

皇上洪恩設教養兵滿洲三千六百八十名蒙古四百八十名漢軍九百六十名滿洲蒙古每名一月給銀三兩漢軍每名給銀二兩令其學習弓馬所以

惠愛八旗之人

恩至渥也但查八旗教養兵有幼穉之人以充額數不能操弓上馬而官學生之年壯者徃徃挑選披甲臣等

伏思官學生內有年壯而讀書遲鈍者令回旗披甲其所出之缺選年幼者補之以習滿文俟其稍長並學弓馬則彼此皆有裨益伏望

聖恩勅令八旗將教養兵額數每旗滿洲分出三十名蒙古十名漢軍十名將此五十名錢糧給官學生計滿洲蒙古每名一月領銀一两五錢漢軍每名一两則壯者既有錢糧以學弓馬幼者亦有錢糧以學文藝長幼皆蒙

聖恩文武皆得造就如此一轉移間則錢糧不必加增而  
官學生皆霑

聖恩鼓舞振興矣

奏入於雍正五年十月十三日奉

旨所議是依議

世宗憲皇帝諭行旗務奏議卷五

欽定四庫全書

世宗憲皇帝諭行旗務奏議卷六

大學士兼管翰林院掌院事張廷玉奏稱

皇上日理政務凡屬內閣部院奉

旨事件俱交

起居注衙門登記檔案惟八旗具奏奉

旨事件向例不交

起居注衙門臣等無從記載請自雍正五年為始凡八

旗具奏奉

旨事件及揀選人員補授官職之處俱交送

起居注衙門以便載入記注

奏入於雍正六年正月二十七日奉

旨所奏是著行文八旗將每日所辦旗下事務俱交送起

起居注衙門

監察御史鄂奇善等奏稱文武各官遵奉

諭旨於平素時按其品級定式各戴帽頂毋得違制僭用

今當奉行之初<sup>臣</sup>等查看得文員內有戴金帽頂而補服用白鷗者武員內有戴珊瑚帽頂而補服用虎者帽頂補服兩不相符即為僭越以似此者甚多不便指名題叅伏乞

勅下禮部行文八旗各部院嗣後若仍有帽頂補服不相符合者查出從重治罪并將該管官員一併議處如此則冠裳之定制畫一而等威愈辨矣

奏入於雍正六年三月二十八日奉

旨這所奏甚是文武官員帽頂著各按品級不准算加級  
交大學士等曉諭吏部兵部及八旗知道

兵部議覆據副都統李國權奏稱漢軍旗分遇演習  
烏鎗之時派令叅領輪班管理責任不專恐有推諉  
等情請照滿洲旗分例每旗將操演火器嫻熟之叅  
領挑選二員該都統等帶領引

見

欽點一員令其操演等語查操演兵丁務有專員與兵丁

等互相知悉觀其能否不時勸懲然後可收嫻熟之效今八旗漢軍遇演習鳥鎗之時令叅領輪班管理責任誠屬不專應如李國權所請令八旗漢軍每旗將操演火器嫻熟之叅領挑選二員該都統等帶領引

見

欽點一員令其專管操演火器之事又奏稱演習火器惟求熟練並不在藥之多寡查京口黑龍江等處操演

兵丁照部內定數每放一鎗使火藥二錢儘堪敷用  
今八旗每放一鎗至用火藥三錢請照依京口黑龍  
江例每一鎗亦用火藥二錢既不致誤操演亦不妄  
費錢糧等語亦應如所請嗣後八旗演習鳥鎗每放  
一鎗令用火藥二錢俟

命下之日行文滿洲火器營八旗漢軍令其遵行

奏入於雍正六年五月初十日奉

旨依議

總督倉場事務戶部右侍郎岳爾岱等奏稱京通各倉向於支放俸米兵糧之時各旗如有應行扣存之米預先咨明戶部者即交該監督將米扣存貯倉如米已經支領而該旗知會咨文後至者即照該旗領出米數催買交倉查此項領出之米因復行交倉每每稽延時日串通倉內人等詭稱收貯其弊不可不除請嗣後將應行扣存之俸米兵糧除知會咨文預至者將米照舊扣存外其已經支領者移咨戶部照

漕糧折價之例老米糶米每石一兩四錢小米每石一兩二錢移咨該旗照領出米數折銀交部如此則積弊可除似於倉務不無裨益

奏入於雍正六年七月十三日奉

旨知道了

議政大臣等議覆據原任副都統廣錫奏稱八旗拴養官馬駝隻原以預備軍需今除阿爾泰一路別無需用馬駝之處其馬匹留京餵養可供兵丁操演之

用至於駝隻既不可在城內騎乘徒費錢糧餵養並  
無用處且牧養駝隻宜在口外寒冷之地請將現今  
八旗動用錢糧餵養之駝八十隻併在場牧放之駝  
八百餘隻俱交張家口外上都等處總管牧養似於  
駝隻有益又可省減錢糧即或欲用不過旬日可以  
取至等語查

上駟院館所有駝隻一百每年於青草出時將一半出  
牧太僕寺所有駝隻一百五十於青草出時盡行出

金史卷之六十一  
卷六  
牧現今雖無兵務然

皇上巡狩所需不可不備應將八旗所有八百九十餘隻  
官駝留四百在京照例每年四月出牧至九月趕回  
餵養其餘駝隻照廣錫所請發往上都等處交彼處  
總管牧養

奏入於雍正六年八月十一日奉

旨依議

管理旗務王大臣等議覆據護軍統領馬蘭泰奏稱

武備為

國家之大事器械乃兵丁之要需私賣軍器者應行嚴禁請將緣罪革退兵丁之軍器撤回給付本缺挑補之人其陞轉亡故兵丁之軍器係賞銀置備者亦撤回給付本缺挑補之人若係本人置備者交該佐領查估價值回明都統給付本缺挑補之人每月坐扣半分錢糧照價給付本人等語查八旗兵丁之軍器

仰蒙

聖恩賞賜銀兩令其修補置備又佐領下新設兵丁之軍器悉由部頒發此賞銀置備及由部頒發者遇缺出悉照馬蘭泰所請給付本缺挑補之人其緣罪革退兵丁之軍器亦照所請撤給本缺挑補之人至陞轉亡故兵丁內有本身置備者該佐領不無任意行私勒令買賣者著佐領會同驍騎校護軍校等傳集原置軍器之人並本缺挑補之人當面估價務使兩相情願方准賣給將其錢糧於三個月內陸續扣完給

付原人若因價值不符不願賣者不可勒令售賣其  
兵丁內有願本身自置軍器者皆給限三個月令其  
置備若已給軍器之兵丁嚴查其有無私賣等情犯  
者照例治罪其疎忽失察之佐領驍騎校護軍校等  
交部查議

奏入於雍正六年八月二十四日奉

旨依議

總理戶部三庫事務和碩怡親王允祥等奏稱查臣

部看守三庫向例銀庫派鑲藍旗閒散官一員驍騎  
校一員領催披甲二十名在內看守後門外驍騎校  
一員領催披甲十名看守在伊旗內輪班行走顏料  
緞疋二庫每庫放八旗食二兩錢糧之庫吏八名看  
守柵欄門外又八旗輪流派出官員領催披甲四十  
名在牆外設立堆子巡察臣等伏思看庫之事甚屬  
要緊今一庫或一旗輪流或八旗循環參差不齊又  
無專管看守之人理應特派官兵著落看守請將銀

庫顏料緞足三庫俱派上三旗官兵看守

紫禁城內銀庫戶部銀庫此二庫俱派鑲黃旗看守顏料庫派正黃旗看守緞足庫派正白旗看守每旗揀選派出閑散官八員驍騎校八員分為四班專令看守此派出之人若能勤慎盡心看守五年無過失者遇應陞之缺著各該旗題補如有過失從重治罪領催披甲聽各該旗官員照依前數揀選派出設立堆子看守顏料緞足二庫庫吏亦於上三旗選用現在

下五旗之庫吏著回各該旗酌量別缺補用俟

命下之日將應派官兵之處交與兵部辦理

奏入於雍正六年九月初五日奉

旨依議

管理旗務王大臣等議覆據副都統班第奏稱正黃

正紅鑲紅此三旗出場馬匹俱由獨石口出口嗣後

請改從張家口出口等語查從前正黃正白正紅鑲

白鑲紅此五旗官馬從獨石口出口鑲藍旗官馬從

張家口出口其餘俱從古北口出口後准副都統岳爾岱條奏正白鑲白此二旗官馬停其從獨石口出口改令左翼四旗官馬悉從古北口行走今獨石口路甚窄隘且有石嶺馬匹往返甚覺費力若從張家口出口則出入統計四百二十里較之獨石口既近六十里且路甚寬敞嗣後應將右翼四旗出場官馬俱令從張家口行走

奏入於雍正六年九月十七日奉

旨依議

管理旗務王大臣等議覆據副都統韓光基奏稱兩旗共立一學八旗入學讀書之子弟每旗不過數人且有竟無一人者蓋因兩旗之人各自散處其遠者或值天寒或值雨水難行不能就學所以至於乏人請於八旗官房內量其足用揀擇四所共為八所每旗各立一學增添教習四員共為八員每學一員其入學讀書之人不必限定額數年二十以下十歲以

上情願讀書者俱令入學如有讀書不能成就者仍照常挑取兵丁或所居與別旗學舍相近情願就近讀書者聽其自便將此交禮部與八旗同行管轄其教習三年考滿及一應需用等項俱交禮部承管至揀選讀書子弟督查怠玩等事每旗派叅領一員輪流承管如禮部承管事件或致廢弛及教習等訓誨不勤有悞子弟令該旗大臣查叅如本旗承管事件或致廢弛亦令禮部查叅又奏稱八旗降革官員及

革退兵丁亦應揀用查外省因公革退人員荷蒙

聖恩俱得具呈補用則八旗因公革退及降調人員亦應

照依此例交八旗大臣等擇其可用者引

見於護軍校驍騎校等缺補用以贖前愆若行走果好仍  
加陞用若不効力行走仍革退交部治罪其革退領  
催馬甲人等亦應擇其可用者准其挑兵挑取之後  
如不効力行走嚴加懲責等語查副都統韓光基所  
奏添設義學及揀用降革官員兵丁之處甚是應照

所請施行

奏入於雍正六年十一月二十六日奉

旨依議

總理戶部事務和碩怡親王允祥奏稱從前各部院及八旗等處於封印之前一日俱在空紙及封套上用印俟封印後遇有緊急事件以備行文查雍正二年准條奏所請將空紙上用印槩行停止在案但錢糧軍務等事所關甚重俱以印信為憑今不用印文

恐反生弊端請仍照舊例於空紙上用印將數目明白登記部院則交堂官收貯八旗則交都統收貯以備緊急公文之用開印後將用過數目登記檔案外其未用者各堂官都統等詳悉揀看銷燬倘官員書隸有借端作弊者該堂官都統等即指名題叅從重治罪若堂官都統等不行題叅日後發覺一併交部嚴加議處

奏入於雍正六年十二月十一日奉

旨是依議

決定回車

世宗憲皇帝諭行旗務奏議

十二

世宗憲皇帝諭行旗務奏議卷六

欽定四庫全書

世宗憲皇帝諭行旗務奏議卷七

八旗都統等議覆據副都統梁永禧奏稱八旗大臣  
等於會議處應照九卿議事之例按左右翼挨旗各  
論品級敘坐如有不按品級越次不整者令查班御  
史即行糾叅交部議處等語查臣等從前會議之處  
俱按翼排班列坐自

皇上將臣等分為三班議事之後凡未定稿之前各於各

班會議及定稿之後三班公同會議之期乃知會御  
史令其糾察嗣後於本班會議之事仍各分班會議  
外其於公同會議之時照副都統梁永禧所請分別  
兩翼按旗各照品級列坐詳悉議事倘有越次不整  
者令查班御史即行指叅

奏入於雍正七年閏七月十三日奉

旨依議

兵部議覆據副都統宗室諾穆住奏稱內府佐領渾

托和以及五旗包衣佐領下在外任之官員丁艱服滿候選及考試進士舉人生員遞名併遞逃牌等事該佐領叅領等即據所遞之呈呈明都統用印咨部但此等事惟各該管處知之甚明該旗無憑稽察恐有不肖之人從中作弊亦未可定臣請嗣後內府佐領渾托和下人俱令其具呈內務府總管衙門由總管查明用印咨旗五旗包衣佐領下人令各該管辦理家務之人查明出具保結畫押呈送該旗由該旗

用印咨部則事件分明無滋弊之端矣等語查內府  
佐領渾托和下之人凡有此等事件俱由內務府總  
管查明用印咨旗轉部此件應無庸議惟五旗包衣  
佐領祇用包衣叅領關防其辦理家務之人並不列  
名畫押不無舛錯滋弊之處應如諾穆住所奏嗣後  
五旗包衣佐領下外任官員有丁艱服滿遞名考試  
及遞逃牌等事俱令該包衣叅領佐領鈐用關防回  
明辦理家務之人列名畫押呈送該旗由該旗查明

用印轉咨該部如該管之人不加詳慎致生弊端令各該旗都統等查叅照例治罪

奏入於雍正七年閏七月十五日奉

旨依議

監察御史齊士齊奏稱查部院已結未結案件每月俱造冊二次送至監察御史處查核如有違限及遺漏等事查出於月底載入彙奏本內題叅所以部院一應事務俱秩然就理八旗事件雖每月造冊送監

察御史處稽察然至一年始彙奏一次其中有一月  
內辦理已結未結之事乃遲至兩三月之後始行送  
冊或有逾限及遺漏等事難於稽察誠恐滋弊臣請  
嗣後八旗事件亦照部院之例令其每月二次送至  
御史處以備稽察於月底彙奏如有逾限遺漏等故  
一併載入本內題叅如此則旗務部務俱秩然有序  
亦不致有稽遲耽延之弊矣

奏入於雍正七年閏七月十五日奉

旨此奏是照依施行不必具本即用摺奏

兵部議覆據副都統朱國極奏稱八旗咨文宜用封套查各部院衙門咨文俱加封套者所以防洩漏而杜刪改也八旗行文各部之事無論大小輕重俱無封套是以不肖之徒打探消息鑽營刪改俱未可定應如該副都統所請嗣後除八旗在京城傳集官員人等照常不用封套外凡八旗行文部院事宜俱令加封套實封鈐印如有重要大事亦照例彌封遞送

若應加封之事竟不彌封致有洩漏刪改等弊將承辦封送各官查叅如重大事務照收貯紅本不謹例降一級留任如事務稍輕照不應輕律罰俸九箇月俟

命下之日傳示八旗一體遵行

奏入於雍正七年八月初一日奉

旨依議

兵部議覆據副都統徐仁奏稱凡具奏事件所關甚

要八旗事務俱係摺奏所奉

諭旨繕寫摺片覆奏之後即收貯公署至於一應錢糧虧空及補授官員叅處等事所奉

諭旨尤為緊要倘有不肖人員於伊有涉之事賄囑原寫奏摺之人另寫一摺將覆奏之

旨亦另書寫伺隙將原摺換出以為日後作弊之地亦未可定逮至日久又無印信可憑字跡又係一人之手則真偽莫能辨矣臣請嗣後將八旗奏摺及覆奏之

旨俱粘於一處於合縫之處鈐蓋旗印封固仍立一號簿

將奏摺與所奉

諭旨照樣謄寫亦鈐蓋印信收貯則弊實可除而稽查亦  
易等語查各部院具奏事件俱立稿案用印註冊收  
貯所以重事務而杜奸欺也嗣後八旗摺奏事件應  
如副都統徐仁所請將奏摺及覆奏之

旨俱粘於一處合縫之處鈐蓋旗印敬謹收貯設立號簿  
將年月事由及所奉

諭旨謄寫用印以備稽查其承辦之人遇有陞轉事故將號簿交接任官管理倘有玩忽作弊等事即行叅奏交部議處

奏入於雍正七年八月初二日奉

旨依議

八旗都統等議覆據都統穆森奏稱各旗佐領下之閒散滿洲間有過多過少之不齊遇挑補領催馬甲之時其過少之佐領每不得人而過多之佐領又致

壅塞請將各旗閒散滿洲數目查明於本旗內酌量均撥使各佐領下不致有過多過少等語查挑補領催馬甲雖亦有人丁甚多甚少之佐領但八旗佐領原有勲舊原管公中之分若照都統穆森所請交相均撥必致刪改人丁冊檔此係行之久遠之事積至數年其人丁冊檔不均又須另為刪改且勲舊佐領原管佐領下人各懷欲出本佐領之心從中蒙混反滋弊端嗣後挑選馬甲若該佐領下教養兵開戶人

赫爾根蒙古家生子之內果無可挑之人請照挑補  
前鋒護軍之例於該旗內挑選不必刪改丁冊將此  
人仍留於原佐領下令在得甲之佐領下支領錢糧  
如此既不刪改冊檔移動佐領而挑選兵丁亦不致  
乏人矣

奏入於雍正七年八月二十六日奉

旨依議

禮部議覆據都統德成奏稱八旗遇考試文生員舉

人進士之時俱令射馬步箭此係

大典攸關既定有考試日期其咨取名冊之處亦不可不定以期限請嗣後禮部於四箇月以前行文該旗咨取考試人等名冊該旗由部文到日即將姓名年貌清查造冊於兩月以前送至禮部禮部即會同兵部將應試人等之旗分姓名年貌明白查對若該旗故意遲延有逾定限者禮部即據實叅奏若係該旗遺漏錯誤者監箭大臣等查明叅奏其遺漏之人仍

令考試等語查八旗考試人等禮部行文該旗咨取名冊轉送兵部考試馬步箭若不預為查對名冊臨期倉卒或有錯誤亦未可定應如都統德成所請施行再查科考之年該學臣於六七月間始行考取生員於八月即入場鄉試為日無多不可拘定四月兩月之限應於科考之後該旗作速造冊送部轉送兵部考試馬步箭又奏稱內府莊頭等之子弟係莊屯居住之人臨考之際派出之內府叅領不能認識恐

不無代考之弊等語查舊例八旗每逢考試之時每旗原派叅領一員驗看送考以防假冒之弊但止叅領一員於一旗考試之人尚不能盡皆認識況內府莊頭之子弟俱係鄉屯居住之人益難認識應如所請嗣後遇考箭及入場考試之時每旗派叅領一員每甲喇派好章京一員令每佐領渾托和之下領催等將考試之人帶往叅領前認識驗看再將派出之叅領章京領催等職名及考試人等名冊一同送往

禮部禮兵二部查對檔案之時亦將伊等傳往公同查對俾不得遺漏錯誤射完入場之時亦令原派出之叅領章京領催等驗看送入若派出之員有不去者該部即行題叅治罪又奏稱向例未至十五歲之人俱不令射馬箭惟射步箭等語亦應如所請嗣後未至十五歲之人俱不令射馬箭惟令射步箭倘有嫻習馬射之人情願射馬箭者亦准考試馬箭可也

奏入於雍正七年九月初九日奉

旨依議

八旗王大臣等議覆據副都統傅昌奏稱八旗蒙古  
游牧地方每旗有捕盜之六品官兩員俱係由京城  
之前鋒護軍領催內揀選補授者乃將伊等既不入  
於京城應陞之例而游牧地方又無伊等應陞之缺  
是不獲有前進之路矣應將伊等等交各該管游牧地  
方之總管等視其効力勤慎於五年無過填註考語  
保送各該旗記檔遇伊等應陞缺出與京城之驍騎

校護軍校等一體揀選題補若有效力不勤者令該管總管指名行文該旗該旗視其事之輕重題叅治罪等語應如副都統傅昌所請八旗蒙古游牧地方所有之捕盜六品官交與各該總管等視其效力勤慎五年無過者填註考語保送該旗記檔遇伊等應陞缺出該旗指名行取與京城之驍騎校護軍校等一體帶領引

見補用若効力不勤有過者該總管等即行文該旗該旗

察明情由視其輕重題叅交部治罪俟

命下之日行文八旗蒙古一體遵行

奏入於雍正七年九月十三日奉

旨依議

副都統宗室諾穆柱奏稱凡

特旨禁約之事及議准之條陳事件俱於降

旨之日隨即登記檔案嚴行傳示不時曉諭該叅領官員

等令其約束繼有應禁事件亦仍前嚴行交付但現

在禁約事件雖一時遵行其從前禁約之事日久即漸致懈弛是名雖禁約其實於事並無裨益臣請嗣後凡

特旨禁約之事及大臣等條奏議覆准行之事交八旗查明欵項彙成一冊送都察院稽察外各該旗察旗叅領侍衛等亦送一冊令其稽察再各旗凡一應禁約之事不論新舊俱照依彙成檔冊令甲喇佐領下俱各立一冊嚴行禁約如此凡禁約事件庶不致懈弛

矣

奏入於雍正七年九月二十二日奉

旨此奏是交八旗大臣照所奏遵行

八旗都統等議覆據理藩院尚書特古忒奏稱八旗  
領催馬甲人等嗣後如有事故告假者俱令報明該  
叅領佐領等將所往之處及何等事件往返幾日問  
明稟知都統等給與印票填寫事由回時將印票繳  
還其護軍前鋒等有告假者令於各該管處呈明轉

行該旗亦給發印票遣往回時繳還閒散人等令本  
佐領給與圖記等語應如所奏嗣後領催馬甲人等  
如實有事故告假者令其告知該佐領報明叅領等  
將其所往之處及來去日期詳查呈明都統等在公  
署存案令該叅領鈐用關防給與牌票遣往回來之  
時將原領之票繳還銷案其護軍前鋒各項執事人  
等告假者俱由各該管處行文該旗該都統等交叅  
領等查明亦給與叅領關防牌票遣往其閒散人等

告假令佐領告知叅領給與圖記遣往回來之時俱令繳還倘有逾限不回及不繳印票等事鞭責五十如不領印票私行他往或雖告假不往所指之處另往他處者查出鞭責一百革退係閑散人亦鞭一百俟

命下之日傳示八旗一體遵行

奏入於雍正七年十月十一日奉

旨依議

副都統馬哈達奏稱查支放八旗官員俸米向來俱按官員等之品級各給紅票為憑由倉領取乃今年支放秋季俸米將票更改凡一佐領下有官幾員共給一票支領臣思此更票之由或於倉內有益使其不能作弊因而更之亦未可定仰請

勅下倉場侍郎等或一佐領共給一票為善或每官各給一票為善之處令其詳查妥議奏

聞著為定例通傳八旗一體遵行

奏入於雍正七年十月十一日奉

旨八旗官員之俸米一佐領給與一票按票支放兵丁之米仍照舊例支放將此通傳八旗一體遵行

兵部議覆據監察御史唐延奏稱刑部行查八旗事件少則一月多則遲至二月有餘不行回覆以致案件不能依限完結嗣後由刑部咨查八旗之事若仍有逾限不行回覆者請交臣等於每月註銷檔案本內一併聲明參奏等語應如所請嗣後刑部及各部

院咨查八旗事件易於完結者令於十日之內即行完結倘有輾轉咨查調取之處不能依限回文者令該旗將不能依限完結之故聲明咨部如有故為遲延以致逾限者令該衙門於註銷月冊檔內聲明咨送科道詳查將該旗遲延月日情由入於註銷檔案本內一併叅奏交該部照遲延事件例分別議處如此則八旗事務不致耽延而各部院案件亦得依限完結矣

奏入於雍正七年十月十七日奉

旨依議

戶部議覆據稽察抵通漕船御史梅穀成等奏稱訪得通倉開放大檔倉役賄賂監督家人每廠費錢十千蓋倉役分管廠座若不用錢即不開其所管之廠也且監督公署鋪設柴炭食用等項多令倉役供給又訪得八旗監看放米之官員盤纏日用多取之倉役是以領米之用錢不惟不行禁止且有為之慫恿

者嗣後請於開放大檔之時將挨陳應開之厥掣籤  
開放如不掣籤以致家人賣厥者事發照州縣失察  
家人犯贓例叅處而一應鋪設供給不得絲毫派索  
倉役違者查叅計贓科罪至監看放米官員揀選老  
成謹守之員盤纏日用皆令自備如與倉役勾通需  
索領米之人希圖分肥者查出計贓叅處其漫不經  
心任從需索不行禁止掣首者察出竝該倉監督俱  
照州縣失察衙役犯贓例叅處等語查開放大檔例

係挨陳支放不許需索錢文選擇厥口久經嚴禁在案今該御史訪得通倉監督及監看放米之官員盤纏日用多係倉役供應是以不行禁止領米之人用錢竝有家人賣厥等弊奏請嚴定處分之例應如該御史所奏行令倉場嚴飭各倉監督行文八旗都統誠飭派出監看放米之官員將應放厥座公同挨陳掣籤俱不得私派供應併嚴禁領米人員用錢及倉役家人勾通需索如仍有前項情弊即將監督同監

看放米之官員照例議處倉役家人等按律究治  
奏入於雍正七年十月二十四日奉

旨依議

和碩莊親王允祿等議覆據副都統宗室鄂齊奏稱  
近見教習兵丁步射惟以式樣硬弓為事不以中的  
為能兵丁等惟期外觀之美只圖用大箭竝不與弓  
力相稱亦不以中的為務臣請嗣後八旗兵丁習射  
令各該管官員務以嫻熟中的為要則兵丁愈見精

銳等語臣等詢問年老善射人等據稱箭輕弓硬則箭出有力而指發亦準若箭重弓軟則指發不準務期弓箭相稱始能嫻熟等語應照副都統宗室鄂齊所請八旗訓練兵丁步射務令弓箭相稱除每月六次操演官箭外現在各叅領處學習拉弓不時較射務令以純熟為要如有步射嫻熟善於中的者以歸於硬弓兵丁內記名又條奏內稱兵丁等製造披子箭五枝需銀一兩有餘不時習射易於損壞請於每

月六次官射照常用披子箭外其一應習射之處俱  
著用髀頭則指發與彌針箭相同而與製造披子箭  
之價甚覺節省等語將此詢問年老善射人等據稱  
髀頭於兩三力之弓尚屬可用若四五力以上之弓  
射出必至飄揚若論價值髀頭之價甚賤尋常演射  
無論披子箭髀頭皆可等語嗣後除每月六次官射  
照常用披子箭外若尋常訓練兵丁時隨其所有無  
論髀頭披子箭皆許射用如此則兵丁等大有裨益

而技藝更加精進矣

奏入於雍正七年十一月初六日奉

旨依議

管理旗務王大臣等議覆據刑科給事中常住奏稱  
將八旗各佐領下聽事兵所拴養之馬交該旗大臣  
等與官馬一體查點等語又據光祿寺少卿德爾弼  
奏稱將每佐領下聽事兵各拴馬一匹之處改為一  
甲喇共拴馬六匹足供傳事之用等語查八旗滿洲

蒙古各佐領下給與三兩錢糧所養自立之馬共八百七十八匹每日所用之馬滿洲都統衙門每旗各五匹火班之處各六匹五甲喇聽事之處二十五匹跟隨大臣等巡查堆子之馬五匹八旗當月處一匹共需馬四十二匹蒙古都統衙門每旗各二匹火班之處各二匹甲喇聽事之處八匹跟隨大臣巡查堆子之馬二匹共需馬十四匹滿洲八旗所餘之馬三百三十八匹蒙古八旗所餘之馬九十二匹俱於迎

接織造府送來之緞疋迎送高麗及牧放太僕寺所  
餘之駝馬看守內外兩館蒙古之馬及押送犯人遞  
送封套等事應用臣等伏思八旗當月處之馬一匹  
滿洲都統等衙門之馬各五匹蒙古都統等衙門之  
馬各二匹火班處滿洲旗分之馬各六匹蒙古旗分  
之馬各二匹俱應照舊令其拴養外其滿洲五甲喇  
聽事處所有之馬二十五匹應裁去十五匹止拴十  
匹蒙古兩甲喇聽事處所有之馬八匹應裁去四匹

止拴四匹滿洲旗跟隨大臣等巡查堆子之馬裁去  
三匹止拴二匹蒙古旗裁去一匹止拴一匹足供當  
差之用又據護軍統領七十奏稱請將八旗所養官  
馬每旗分九匹給與護軍等以為傳事之用等語查  
佐領下所拴養之馬俱係以備緊要之用若用以傳  
事則難於肥壯請將此項裁減馬匹之錢糧每旗護  
軍營給與九分令其拴馬以備傳事之用此項馬匹  
俱係動用正項錢糧拴養之馬若無查看或日久弊

生致有冒領謊報之處亦未可定應如給事中常住所請交各該旗大臣等不時查看外值兵部查看之時亦令其一併查看

奏入於雍正七年十一月初九日奉

旨知道了

兵部議覆據署天津滿洲水師營都統事務拉錫奏稱查各省駐防官員大省分滿洲每旗五佐領蒙古每旗二佐領小省分滿洲每旗三佐領蒙古每旗一

佐領每翼設放協領一員令其管束如官員缺出滿洲旗分所有五佐領三佐領挑選去得之人尚屬容易至蒙古旗分止有一二佐領難得應補之人如行文京城補授而京城用人之處甚多蒙古人員亦少請將各省蒙古旗分官員缺出於本翼內揀選題補庶得其人等語應如所請嗣後蒙古旗分佐領防禦等官缺出令該將軍副都統等秉公於各翼內揀選應補之人題補如此則蒙古人才不致壅滯而各省

員缺俱得其人矣

奏入於雍正七年十一月二十八日奉

旨依議

議政大臣等議覆據都統秦布奏稱下五旗移入公  
中佐領下之章京護軍校兵丁等除在各該旗當差  
該班外仍與上三旗人員在

紫禁城內看守行走惟驍騎營之官員雖節下朝會之  
期與上三旗官員一體行走至於挑選一應執事之

人俱不將伊等之子弟挑取請嗣後將下五旗移入  
公中佐領之人亦照上三旗例於大臣官員子弟內  
挑取一應執事之人令其在

禁地學習行走等語應如秦布所請嗣後將下五旗移  
入公中之佐領下大臣官員子弟內凡有挑選侍衛  
執事之人俱照上三旗例一體挑取令其在

禁地學習行走其有志上進與漢仗好者既得効力之  
處且亦皆可成就矣

奏入於雍正七年十二月二十日奉

旨依議

世宗憲皇帝諭行旗務奏議卷七

欽定四庫全書

世宗憲皇帝諭行旗務奏議卷八

副都統黑塞奏稱

皇城週圍立有八旗火班其該班滿洲蒙古漢軍三旗大臣內凡有出差兼別職者該旗大臣等即將該旗官員姓名咨行兵部代為該班查火班之地與

皇城相近所係匪輕官員等不便代大臣該班臣愚以為如滿洲蒙古漢軍三旗大臣內凡有出差兼別職

者不准以官員代替即令三旗所餘大臣輪流該班如此則日間可以在都統衙門照常辦事而夜間亦可無曠火班矣

奏入於雍正八年二月十九日奉

旨此奏是照所請行

步軍統領阿齊圖等議覆據監察御史覺羅莫禮博奏稱八旗都統等該火班之處備有激桶但火班處都統遇失火之時無人通報恐致稍有遲悞請嗣後

交與步軍統領有用激桶之事令步軍等亦通報相  
近該火班之都統轉為通知他旗火班之處如此則  
於救火之事不致有悞等語臣等查得失火之處若  
係左翼則左翼四旗往救係右翼則右翼四旗往救  
凡倉庫衙署及

皇城之內八旗俱各往救今莫禮博既稱八旗火班處  
大臣等無人通報恐致有悞應令該地方步軍人等  
遇有失火亦照通報臣衙門之例通報火班處可也

奏入於雍正八年三月十六日奉

旨不必八旗俱往嗣後東南失火著正藍鑲白二旗往救  
西南失火著鑲藍鑲紅二旗往救東北失火著鑲黃正  
白二旗往救西北失火著正黃正紅二旗往救若皇城  
之內每翼著兩旗往救如此不致煩擾於事有益將此  
傳知步軍人等見某處失火即報知其相近該旗不可  
有悞

兵部奏稱各部院衙門咨行各省事件俱係各部院

衙門用印封套函封咨送<sub>臣</sub>部原封轉發惟八旗咨  
行各省事件或一旗亦有用印封套咨送原封轉發  
或一旗移咨<sub>臣</sub>部轉行殊不畫一此轉行事件又無  
另議之項惟照咨抄寫轉行徒費紙筆且事件又至  
遲延仰請嗣後除專咨兵部事件外將八旗各省彼  
此催查等事俱令畫一各處自行用印封套函封咨  
送<sub>臣</sub>部原封轉發如此則事件俱得畫一而又不至  
遲滯矣

奏入於雍正八年三月十七日奉

旨依議

和碩果親王允禮等議覆據副都統延福奏稱鑲黃旗該火班處滿洲蒙古漢軍三旗都統副都統等每日一人輪流進班進班之日又稽察各處看守之官員兵丁竊思火班甚屬緊要既該火班又查他處誠恐一人不能徧及於事不無有悞嗣後火班處請專委大臣一員輪流進班其他看守之處另派大臣輪

流稽察庶兩處俱有專責於事不致有悞等語查正  
黃正白正紅鑲紅正藍鑲藍六旗該火班之大臣專  
任火班並不稽察他處惟鑲黃鑲白兩旗該火班之  
大臣一併稽察各處兩事相兼未免有悞應如延福  
所請鑲黃鑲白兩旗亦照正黃等六旗之例將該火  
班之大臣不令稽察他處以專責任

奏入於雍正八年三月二十二日奉

旨依議

副都統布喜奏稱八旗所奉

上諭應照部院衙門之例轉送內閣係清文者譯漢係漢文者繙清務令畫一庶不致有錯誤再八旗操演官兵每月初三初八等日都統等親詣教場較其優劣若值奏事之日則派叅領一員代都統等前往較射是以官兵人等往往有怠惰不齊之處夫操演官兵之事係都統等專任之責仰請嗣後該旗操演之日若遇有應奏事件每旗於副都統內輪班存留一人

親詣教場較射若有怠惰不到者除出差進班及實  
係有病有故之人外係官一二次不到則嚴加申飭  
記過犯至三次則交該部議處係兵丁一次不到則  
鞭責二十七犯至三次即行責革該大臣等若不親  
往教場或於官員兵丁有徇庇之處經察旗叅領侍  
衛等查出將大臣等一併叅奏如此則可免怠惰規  
避之惡習而技藝亦漸有進益矣

奏入於雍正八年三月二十二日奉

旨布喜奏稱八旗所奉諭旨俱送內閣繙譯等語內閣事務甚多無暇辦此現今尚書常壽所教繙書房內人員甚多八旗所奉諭旨俱交繙書房繙譯伊等亦得學習再閱看官員兵丁射箭之處照伊所請行

管理旗務王大臣等議覆據條奏內稱

恩賞閔散宗室喜喪事故之銀宗人府借與八旗官員生息者每季俱由各該旗收取交送宗人府其中不無遲延虧空等弊仰請嗣後八旗官員內有應交宗人

府之銀兩俱令造入俸祿檔內坐扣如借銀之員有虧空者即將原保官之俸祿造入檔內代扣等語查八旗官員欲借宗人府生息銀兩者指其所有房地奴僕具呈該旗將借銀之官與願保之官有無房地奴僕之處查明轉行宗人府准其借與每季應交銀兩於領俸後由各該佐領將借銀之員應交銀兩即於俸銀內坐扣交送宗人府其中或有不肖之徒將應交銀兩遲延或有將坐扣銀兩那移之弊亦未可

定應如所奏嗣後八旗如有借銀人員仍令一官具保咨行宗人府准其借給其借銀之員每季應交宗人府銀兩俱令造入俸祿檔內咨行戶部坐扣該旗將借銀人員之名姓職銜並應交銀兩數目造具清冊預行咨送宗人府與戶部坐扣銀兩數目核對如借銀人員內別緣事故不能交還者即將原保官之俸祿造入檔內代扣如此則遲延之弊可無亦可免往返行催之事矣

奏入於雍正八年三月二十三日奉

旨依議

禮部議覆據詹事府少詹事伊爾敦奏稱看得八旗官員兵丁遇有喜喪等事不按定例遵行仍有任意靡費者若不嚴行禁止誠恐日久必至相習成風仰請

勅下該部自大小官員以至兵丁凡喜喪等事其應用之項按其職分之尊卑明白分晰著為定例刊刻成書

於八旗各佐領及族長等頒給一本令其傳示曉諭  
凡遇喜喪等事預行報知該佐領該族長務令逐項  
照例遵行等語查雍正元年五月內九卿等遵

旨議覆自民公侯伯滿漢官員以及兵民等其婚喪等事  
俱各按品級著為定例逐款開載一體傳行但未有  
專行曉示稽察之員所以致有任意違越之事應如  
伊爾敦所奏將

欽定款項再行刷印交各該旗令其轉交該佐領族長等

傳示曉諭凡遇喜喪等事預行報知該佐領該族長等照例遵行若有違例僭用者該佐領族長等即報知各該旗都統查明交部治罪若徇隱不報任其違越一經發覺將該佐領族長及僭越之人一併交部分別議處

奏入於雍正八年三月二十六日奉

旨依議著該旗都統察旗御史叅領侍衛及步軍統領一同稽察果有違例僭越者即行叅奏若該旗都統察旗

御史叅領侍衛步軍統領內如有一處查出其餘一併免其議處若經他處查出將該旗都統察旗御史叅領侍衛步軍統領等一併議處

八旗漢軍都統等議覆據都統李杖奏稱八旗漢軍兵丁均係鎗手兼習弓箭惟操演弓箭闔旗官員俱至教場一體操演至於演鎗止有鎗營叅領並派定之官數員看放操演以一旗之衆而專其責於數人不但勢難詳慎且恐草率塞責其餘年少官員一至

演兵合操伊等平素既未身親其事臨時必至茫然無措仰請嗣後八旗漢軍演放鳥鎗亦令照射箭之例闔旗官員除實有別項官差外其餘官員俱令赴教場公同操演日歷身親久之自皆諳練不但合操之際不致茫然即平素教習兵丁亦能指示開導等語查八旗漢軍兵丁實以鳥鎗為要應照都統李柱所請嗣後八旗漢軍凡操演鳥鎗之日仍前派定官員令其教習操演其餘閒散官員俱照射箭之例令

至教場操鎗之處公同閱看經歷既久事必嫻熟不  
但演兵合操之際可以得其指臂之用而年少官員  
於教習兵丁之法亦必諳練矣

奏入於雍正八年三月二十六日奉

旨依議

兵部議覆據太僕寺少卿黑塞奏稱八旗大臣官員  
有因事停陞降級罰俸及有無加級紀錄之處俱令  
該旗逐一詳查咨送兵部登記檔案以備察考外嗣

後凡有因事降級加級及罰俸等事即令該旗作速  
行文該部如此辦理庶不致有遲悞舛錯之弊等語  
應如黑塞所請嗣後臣部行文八旗及前鋒統領護  
軍統領內務府等衙門將現任武職大臣官員履歷  
並有無加級紀錄降級罰俸之處逐一詳查於一月  
之內造具清漢檔冊一本鈐用印信咨送臣部以備  
稽察嗣後該員若有陞轉並議叙議處之案令該旗  
作速行知臣部其暫行署理之員亦將該員上任離

任日期報部若一人兼管他職者亦必明白分晰行文知會臣部以文到之日視其名姓改入冊內登記倘有遺漏舛錯及遲悞逾限等情臣部題參照例治罪如此則旗員武弁既易於稽察而於事件亦不致違悞矣俟

命下之日通行八旗前鋒統領護軍統領內務府及各省駐防之處令其一體遵行

奏入於雍正八年四月初九日奉

旨依議

兵部議覆據副都統趙弘濟奏稱八旗外任文武官員令其各將家內辦事與看門人等姓名及投進緣由按季呈報督撫提鎮轉移吏兵二部知會該旗註冊如係督撫提鎮令其自行報部歸旗後倘有虧空即將辦事看門人等一併催追如不能完納即一同治罪等語查外任旗員因家人管事行私以致本官有貪婪侵蝕之事又或挾制主人欲謀外出或為

本官隱匿貲財假借商人名色為民者俱未可定應如趙弘濟所請嗣後八旗外任文武官員自到任日期勒限三箇月將其帶往之家人名姓及投進緣由造冊呈報督撫提鎮如改換辦事家人亦造冊呈報倘本官有虧空之處著該督撫即將伊辦事家人一併究審如有追賠之項回旗後不能全完將辦事家人照虧空錢糧家產盡絕人子孫之例治罪如本官冊報不實或縱放家人贖身為民者俱照隱匿逃人

例治罪其家人照逃走三次之例發遣其不行查核之官員俱照失察逃人例議處如受財者計贓以枉法論從重議罪

命下之日造入則例通行八旗直省督撫提鎮於文到日  
勒限六箇月一體遵行

奏入於雍正八年四月初十日奉

旨依議

兵部議覆據國子監司業文保奏稱王貝勒貝子公

等與部院衙門及該旗間亦有往來文移之事王府長史及辦理家務之人並無印信關防但以空文咨送不無刪改錯誤之弊仰請嗣後一應行文俱令用包衣叅領關防以為憑據等語應如所請嗣後諸王貝勒貝子公等若有行文該旗之事將王等之長史辦理家務之人列名用包衣叅領關防送至該旗查看係用關防者照例轉行若無關防俱不准收接若王等之長史及辦理家務之人仍用空文以致有刪

改之弊及該旗私行收接者一經查出交部嚴加議處再包衣叅領之關防向與部院無往來行文之例嗣後諸王貝勒貝子公等有行文部院事件俱著用包衣叅領關防送至各該旗由該旗轉行部院衙門將文保條奏用包衣叅領關防直達部院衙門之處應無庸議

奏入於雍正八年四月十七日奉

旨依議

八旗大臣等議覆據副都統黑塞奏稱凡遇

壇

廟大祭

皇上必躬親齋戒以申誠敬之心又恐大小臣工不能敬  
謹竭誠派遣大臣官員稽察特欲同申誠敬共荷

天庥但旗員內或有無知之人不能仰體

皇上至誠之意倘遇該旗都統等俱緣事故不在衙門齋  
戒致有私行飲酒擅離齋所之處亦未可定臣請嗣

壇

後八旗大臣等若因疾病瘡癩或緣他事不能齋戒者即令於不齋戒之大臣內著一員在都統衙門約束齋戒官員庶不肖之員不敢肆行於齋戒之事愈加誠敬等語應如副都統黑塞所請嗣後凡遇祭祀廟齋戒之期若值一旗大臣等俱緣事故不能齋戒者即令於不齋戒之大臣內無論都統副都統務著一人在都統衙門約束齋戒官員令其各凜誠心以肅祭事

欽定四庫全書  
卷八  
奏入於雍正八年六月十一日奉

旨依議

和碩果親王允禮等議覆據條奏內稱八旗有因獲罪將妻子一併發遣復行撤回之人及籍沒家產人等之子仍有自稱為廕生監生依舊戴頂行走者伊等既係罪人之子豈可仍戴廕生監生之頂於例甚屬不合等語查發遣之人俱係獲罪重犯伊等之子在發遣以前身有廕生監生者既同伊父一併發遣

既係罪人後雖奉

旨寬免撤回或係自行贖回豈可自謂從前曾係廕生監生尚戴帽頂行走甚屬非理嗣後有與其父一併發遣之人身有廕生者自奉

旨發遣之日即行知各該處將廕生監生悉行革退其捐納監生之執照交部銷燬其奉

特旨寬免撤回及自行贖回人等之子內有願就文武考試者准其考試有願當護軍馬甲効力行走者准其

挑取有欲捐納監生者亦准其捐納再籍沒家產人等之子伊等之父俱係身獲重罪是以籍沒家產自奉

旨之日伊等之子有廕生監生者即行文該處將廕生監生革退其捐納監生之執照亦行撤回交部銷燬此內有願就文武考試或願當護軍馬甲或再欲捐納監生者亦照發遣人等之子一例准行自禁止之後倘有違例仍戴頂行走者或經查出或被旁人首告

將戴頂之人交該處從重治罪

奏入於雍正八年六月二十四日奉

旨特旨寬免自發遣處撤回及籍沒家產人等之子有願  
考試及捐納監生者著該旗奏聞請旨餘依議

吏部奏稱嗣後由郎中等官承襲阿達哈哈番員外  
郎等官承襲拜他拉布勒哈番主事等官承襲拖沙  
拉哈番者准兼世職仍留部院行走如世職之官品  
級較大而原官品級較小之員除奉

特旨令其兼職在部院衙門辦事者不行出缺外其餘俱  
令專在世職行走所遺員缺另行補授

奏入於雍正八年十月二十日奉

旨依議嗣後世職官員有品級大不應兼司員之人如果  
才具甚優著該堂官保舉引見仍留兼職若尋常供職  
者照例出缺不必題請兼職如有請託瞻徇等弊該員  
引見之時朕視其人材或不應保留或保留之後辦事  
不妥必將保題之堂官嚴加議處

八旗都統等議覆據察旗侍衛那齊布奏稱委署副都統等並非實授大員前施引馬行走之處應請禁止等語查委署副都統一官有管轄官兵之責辦理一切事務悉與副都統一體若不令其前施引馬於一應行走之處無所分別殊與

皇上簡用職銜不能相稱將那齊布所奏禁用引馬之處應無庸議又據奏稱賞給副都統職銜人員內有已得親丁錢糧之人有不得親丁錢糧之人再署理叅

領事務之副叅領等或一旗有已得叅領之親丁錢糧者亦有不得者職同事異理宜斟酌俾其畫一等語仰請嗣後凡奉

特旨賜與副都統職銜諸事悉與副都統一體應照蒙古漢軍副都統之例給與親丁錢糧兩分再現任護軍叅領等官員內有蒙

特恩賜與副都統職銜者既現在當差行走亦應照此例給與至年老告退人員雖賜與副都統職銜並無行

走之處則親丁錢糧不應給與再副叅領等如係於叅領員缺委署者其親丁錢糧應行給與若因叅領出征之缺委署者既非所出員缺則親丁錢糧不應給與又據奏稱副叅領職銜俱係五品乃僭用朝珠蟒服馬頂懸纓任意行走殊屬越分應請禁止等語查定例內四品以上官員始准用朝珠蟒服馬頂懸纓副叅領等官誠為僭越應照定例不准濫用若有違例之人即行叅奏交部治罪

奏入於雍正八年十一月二十六日奉

旨依議

步軍統領阿齊圖奏稱查自官設米局以來一應米價甚平於兵民人等甚有裨益今年米價又覺稍長密訪其由乃係在外商人來京糴去販賣之所致伏思官米局之設特為兵丁等所領米石計其家口足用之外其有餘糴賣者用官價買貯如值米價稍長即發出糴賣欲使價值永平令兵民人等實獲裨益

耳如使在外商人得以販買至數百石之多則在京  
之米既少而價值必至於騰貴矣嗣後請通傳八旗  
將米石惟准賣與京城內外之人將在外商人買至  
數百石之多者嚴行禁止如有不遵禁約將官局之  
米多賣與在外商人者一經查出即將辦理米局事  
務官員交部嚴加議處庶米價得平而不肖之徒堆  
積謀利之弊可除矣

奏入於雍正八年十一月二十七日奉

旨著照所請行



世宗憲皇帝諭行旗務奏議卷八